

Vlada Kantona Sarajevo

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 4. stav (20) Zakona o komunalnim djelatnostima ("Službene novine Kantona Sarajevo", broj 43/16, 10/17 - Ispravka, 19/17, 20/18 i 22/19), Vlada Kantona Sarajevo, na 47. sjednici održanoj 17.12.2020. godine, donijela je

UREDBU**O UREĐIVANJU I ODRŽAVANJU ZELENIH I REKREATIVNIH POVRŠINA U KANTONU SARAJEVO
DIO PRVI - OPŠTE ODREDBE****Član 1.
(Predmet)**

Ovom uredbom propisuju se uslovi i način organizovanja i obavljanja poslova uređenja i održavanja zelenih i rekreativnih površina, te druga pitanja od značaja za obavljanje ove komunalne djelatnosti.

DIO DRUGI - ZELENE POVRŠINE**Član 2.
(Zelene površine)**

(1) Zelene površine u smislu ove uredbe su:

- a) urbano zelenilo kojeg čine: parkovi, trgovi, zelene površine između blokova zgrada, stambenih objekata kolektivnog stanovanja, stambeno - poslovnih objekata, objekata individualnog stanovanja, zelene površine duž saobraćajnica (skverovi, zelene površine duž pločnika, zelene površine uličnih raskršća, zelene površine duž ulica i bulevara zelene površine duž obala rijeka i vodotokova, drvoređi i aleje, travnjaci i drugi nasadi), zeleni pojas uz tramvajsku prugu, zeleni pojas između tramvajskih šina, zeleni pojas uz željezničku prugu, zelene površine specijalnog karaktera (zelene površine industrijskih pogona, zelene površine javnih ustanova, javnih preduzeća i drugih institucija, botaničke bašte i dendro vrtovi, zelenilo na grobljima, zelene površine zooloških vrtova, aboretumi, spomen parkovi i fiskulturni tereni kao zelene površine), zelene površine zaštitnog karaktera u naselju i bašte oko kuća za stanovanje,
- b) prigradsko zelenilo kojeg čine: zaštitni pojasevi oko naselja, park šume, šume park,
- c) vangradsko zelenilo kojeg čine: šume parkovi kao rekreacione zone, zelene površine duž saobraćajnica van naselja, zaštićeni pejzaži i spomenici prirode.

(2) Zelene površine iz stava (1) ovog člana koje su u vlasništvu Kantona Sarajevo, Grada i općina na području Kantona Sarajevo smatraju se javnim zelenim površinama.

Član 3.

(Poslovi uređivanja i održavanja zelenih površina)

- (1) Pod poslovima uređivanja i održavanja zelenih površina u smislu ove uredbe podrazumijevaju se:
 - a) projektovanje (idejni projekat, glavni projekat, izvedbeni projekat, plan sadnje, tehnički prijem, plan održavanja) zelenih površina,
 - b) izgradnja, rekonstrukcija, sanacija i revitalizacija zelenih površina,
 - c) održavanje svih hortikulturnih sadržaja zelenih površina u skladu sa hortikulturnim standardima, agrotehničkim mjerama, kao i skupljanje sjemena i reznica dendro materijala za potrebe rasadničke proizvodnje nadležnog komunalnog preduzeća,

- d) održavanje parkovskog mobilijara i žardinjera i drugih građevinsko-arhitektonskih elemenata koji su sastavni dio zelene površine ili su slobodno stojeće,
 - e) izgradnja, rekonstrukcija i održavanje pješačkih staza, stepeništa i platoa u sastavu zelene površine,
 - f) zimsko održavanje staza, stepeništa i platoa,
 - g) higijena zelenih površina,
 - h) njega, zaštita i sječa stabala,
 - i) fitopatološka i zdravstvena zaštita biljnog materijala na javnim zelenim površinama u skladu sa propisanim zakonskim standardima i uputama,
 - j) primjena ekološki prihvatljivih materijala i sredstava kod održavanja parkovskog mobilijara i drugih arhitektonsko-građevinskih elemenata,
 - k) postavljanje zaštitne ograde na kosinama šetnica na vodotocima.
- (2) Uređivanje i održavanje javnih zelenih površina vrši se putem komunalnog preduzeća nadležnog za održavanje javnih zelenih površina (u daljem tekstu: nadležno komunalno preduzeće).
 - (3) U vršenju poslova uređivanja i održavanja javnih zelenih površina definiranih u stavu (1) tač. a) do k) ovog člana, vlasnici javnih zelenih površina ostvaruju saradnju i koordinaciju sa ministarstvom nadležnim za komunalne poslove, nadležnim komunalnim preduzećem, Zavodom za planiranje razvoja Kantona Sarajevo, Zavodom za izgradnju Kantona Sarajevo, Zavodom za zaštitu kulturno-historijskog i prirodnog naslijeđa Kantona Sarajevo, obrazovnim i naučnim institucijama iz oblasti biotehničkih nauka o pitanjima održavanja i razvoja javnih zelenih površina.
 - (4) O stanju javnih zelenih površina na području Kantona Sarajevo, vrši se redovno informisanje javnosti i građana od strane nadležnog komunalnog preduzeća.

Član 4.

(Preuzimanje novoizgrađenih javnih zelenih površina na održavanje)

Nadležno komunalno preduzeće preuzima na održavanje novoizgrađene javne zelene površine od vlasnika samo uz potrebnu dokumentaciju neophodnu za uređivanje, odnosno održavanje novoizgrađene zelene površine.

Član 5.

(Katastar javnih zelenih površina Kantona Sarajevo)

- (1) O svim javnim zelenim površinama vodi se evidencija u digitalnom Katastru javnih zelenih površina Kantona Sarajevo.
- (2) Katastar javnih zelenih površina Kantona Sarajevo je organizovan u digitalnom obliku sa prostorno-atributnim komponentama.
- (3) Katastar javnih zelenih površina Kantona Sarajevo treba da je jasan, jednostavan, upravljiv, primjenjiv, prilagodiv, nadogradiv, interaktivan i tehnološki aktivan.
- (4) Katastrom se evidentiraju svi hortikulturni sadržaji (travnjaci, stabla, ukrasni grmovi, ružičnjaci, živa ograda, cvjetne gredice, trajnice i drugi dendromaterijali) sa osnovnim karakteristikama o istim, te arhitektonsko-građevinski elementi (parkovske klupe, korpe, informativni panoi, žardinjere, fontane, spomenici, dječija igrališta sa sadržajem, mali sportski tereni sa sadržajem, pojedinačne sprave za rekreaciju i sl.) koji se nalaze na javnoj površini.
- (5) Uspostavu, ažuriranje i praćenje digitalnog Katastra zelenih površina Kantona Sarajevo vrši nadležno komunalno preduzeće.
- (6) Katastar zelenih površina Kantona Sarajevo je dostupan ministarstvima Kantona Sarajevo, Gradskoj upravi Grada Sarajeva i općinama u Kantonu Sarajevo, Zavodu za

planiranje razvoja Kantona Sarajevo, Zavodu za izgradnju Kantona Sarajevo, Kantonalnoj upravi za inspeksijske poslove, po proceduri utvrđenoj od strane nadležnog komunalnog preduzeća.

- (7) Nadležno komunalno preduzeće je obavezno, najmanje jednom godišnje ministarstvu nadležnom za komunalne poslove i općini dostavljati informacije o stanju i promjenama nastalim u Katastru javnih zelenih površina, naročito radi uvrštavanja novouređenih javnih zelenih površina u Plan i program održavanja za narednu godinu, a koje je komunalno preduzeće preuzelo na održavanje u skladu sa članom 4. ove uredbe.
- (8) Vlasnici javnih zelenih površina su obavezni u kontinuitetu dostavljati informacije o svim promjenama nastalim intervencijom vlasnika na javnim zelenim površinama nadležnom komunalnom preduzeću.

Član 6.

(Plan i Program održavanja javnih zelenih površina)

- (1) Javne zelene površine održavaju se na osnovu godišnjeg plana i programa održavanja javnih zelenih površina u Kantonu Sarajevo, kojeg odobrava ministarstvo nadležno za komunalne poslove svake godine za narednu godinu.
- (2) Nadležno komunalno preduzeće, obavezno je do oktobra tekuće godine dostaviti plan održavanja javnih zelenih površina u Kantonu Sarajevo za narednu godinu, usaglašen sa općinama na području Kantona Sarajevo, ministarstvu nadležnom za komunalne poslove na usvajanje.
- (3) Nadležno komunalno preduzeće obavezno je da usvojeni plan i program održavanja javnih zelenih površina dostavi Kantonalnoj upravi za inspeksijske poslove u roku od 15 dana od dana usvajanja.
- (4) Plan održavanja javnih zelenih površina sadrži: pregled svih zelenih površina sa sadržajem po općinama i lokacijama u okviru općina, faze rada za svaki sadržaj, površinama, količinama, cijenama i terminima rada po fazama i sadržajima.
- (5) Cijena održavanja javnih zelenih površina utvrđuje se na način kako je to predviđeno članom 22. Zakona o komunalnim djelatnostima ("Službene novine Kantona Sarajevo", br. 43/16, 10/17 - Ispravka, 19/17, 20/18 i 22/19).
- (6) Vlasnici zelenih površina u saradnji sa ovlaštenim komunalnim preduzećem mogu ugovarati izgradnju, sanaciju i rekonstrukciju zelenih površina kroz posebne programe, sporazume i ugovore.
- (7) Nadležno komunalno preduzeće obavezno je do oktobra tekuće godine dostaviti plan rada zimske službe preduzeća sa pregledom lokacija, fazama rada, količinama, cijenama, terminima rada, usaglašen sa općinama na području Kantona Sarajevo, ministarstvu nadležnom za komunalne poslove na usvajanje.

Član 7.

(Sredstva za održavanje javnih zelenih površina)

Sredstva za održavanje javnih zelenih površina obezbjeđuju se iz Budžeta Kantona Sarajevo i budžeta općina na području Kantona Sarajevo.

Član 8.

(Održavanje ostalih zelenih površina)

- (1) Održavanje ostalih zelenih površina, koje su u vlasništvu drugih pravnih i fizičkih lica, održavaju vlasnici shodno odredbama ove uredbe iz vlastitih sredstava.
- (2) Vlasnici ostalih zelenih površina, mogu povjeriti nadležnom komunalnom preduzeću održavanje svojih zelenih površina, o čemu se zaključuje ugovor u kome će se precizirati prava i obaveze potpisnika ugovora.

DIO TREĆI - REKREATIVNE POVRŠINE

Odjeljak A. Rekreativne površine

Član 9.

(Rekreativne površine)

- (1) Pod rekreativnim površinama u smislu ove uredbe podrazumijevaju se: dječija i sportska igrališta, izletišta, šetališta, sportski tereni, otvoreni bazeni, strelišta i slično, koji se nalaze na javnim površinama i na otvorenom prostoru.
- (2) Izgradnja izletišta, šetališta, otvorenih bazena, strelišta i slično, vrši se u skladu sa prostorno-planskom dokumentacijom i Zakonom o prostornom uređenju Kantona Sarajevo ("Službene novine Kantona Sarajevo", br. 24/17 i 1/18).
- (3) Održavanje rekreativnih površina iz stava (2) ovog člana vrši vlasnik neposredno ili putem pravnog lica registrovanog za obavljanje poslova održavanja.

Odjeljak B. Dječija i sportska igrališta

Član 10.

(Dječija i sportska igrališta)

- (1) Dječija i sportska igrališta (u daljem tekstu: igrališta) su objekti posebne namjene i ista su od posebnog i javnog značaja.
- (2) Dječija igrališta su površine na kojima su postavljeni dječiji rekviziti i sprave za igru djece.
- (3) Sportska igrališta su površine, sa ili bez sportskih sprava i rekvizita, koje su namijenjene za sport i rekreaciju građana svih starosnih doba.

Član 11.

(Korištenje)

Dječija i sportska igrališta, kao objekti od posebnog i javnog značaja mogu se koristiti samo u svrhu za koju su izgrađeni i namijenjeni, a u druge se svrhe mogu koristiti samo uz odobrenje nadležnog općinskog organa.

Član 12.

(Izgradnja)

- (1) Izgradnja igrališta vrši se u skladu sa prostorno-planskom dokumentacijom i Zakonom o prostornom uređenju te u skladu sa važećim standardima.
- (2) Pod izgradnjom dječijeg i sportskog igrališta podrazumijeva se:
 - a) projektovanje,
 - b) građenje,
 - c) stručni nadzor građenja dječijeg i sportskog igrališta.
- (3) Pod građenjem se podrazumijeva bilo koji zahvat u prostoru i svako drugo privremeno ili trajno djelovanje ljudi kojim se uređuje ili mijenja stanje u prostoru, a obuhvata izvođenje pripremnih radova, građevinskih radova, ugradnju i montažu opreme, te druge zahvate u prostoru. Građenjem se smatraju i radovi rekonstrukcije, dogradnje, nadogradnje, promjene namjene, sanacije, revitalizacije, konzervacije, izgradnje privremenih građevina i uklanjanje postojećeg dječijeg i sportskog igrališta.
- (4) Zahvati se izvode na osnovu odobrenja za građenje. Svako novoizgrađeno dječije i sportsko igralište mora imati potrebnu dozvolu.
- (5) Izgradnju i sredstva za izgradnju dječijih i sportskih igrališta obezbjeđuje Grad, odnosno jedinica lokalne samouprave u skladu sa finansijskim mogućnostima.

Član 13.

(Standardi)

- (1) Dječije i sportsko igralište u upotrebi mora biti sigurno.
- (2) Na dječije i sportsko igralište može se postaviti samo oprema za igralište koja ispunjava zahtjeve u pogledu opće sigurnosti proizvoda.

- (3) Oprema koja se ugrađuje na dječijim igralištima može se smatrati sigurnom ako ispunjava sigurnosne zahtjeve propisane u sljedećim standardima:
- BAS EN 1176-1 Oprema i površine za dječija igrališta - Dio 1: Opći sigurnosni zahtjevi i metode ispitivanja,
 - BAS EN 1176-2 Oprema i površine za dječija igrališta - Dio 2: Dodatni posebni sigurnosni zahtjevi i metode ispitivanja za ljuljačke,
 - BAS EN 1176-3 Oprema i površine za dječija igrališta - Dio 3: Dodatni posebni sigurnosni zahtjevi i metode ispitivanja za tobogane,
 - BAS EN 1176-4+Corl Oprema i površine za dječija igrališta - Dio 4: Dodatni posebni sigurnosni zahtjevi i metode ispitivanja za opremu sa žicama,
 - BAS EN 1176-5 Oprema i površine za dječija igrališta - Dio 5: Dodatni posebni sigurnosni zahtjevi i ispitne metode za vrteške,
 - BAS EN 1176-6+Corl Oprema i površine za dječija igrališta - Dio 6: Dodatni posebni sigurnosni zahtjevi i ispitne metode za sprave za njihanje,
 - BAS EN 1176-7 Oprema i površine za dječija igrališta - Dio 7: Uputstvo za instalaciju, inspekciju, održavanje i korištenje,
 - BAS EN 1176-10 Oprema i površine za dječija igrališta - Dio 10: Dodatni posebni sigurnosni zahtjevi i ispitne metode za potpuno ograđenu opremu za igru,
 - BAS EN 1176-11 Oprema i površine za dječija igrališta - Dio 11: Dodatni posebni sigurnosni zahtjevi i metode ispitivanja za prostorne mreže,
 - BAS EN 1177 - Podloge na igralištima koje ublažavaju udar - Određivanje kritične visine pada,
 - BAS CEN/TR 16396 Oprema za dječija igrališta - Odgovori na zahtjeve za interpretaciju standarda BAS EN 1176 i njegovih dijelova,
 - BAS CEN/TR 16598 Skup obrazloženja za standarde grupe BAS EN 1176 - Zahtjevi.
- (4) Koševi i golovi za rukomet koji se najčešće ugrađuju na otvorenim sportskim plohama mogu se smatrati sigurnim ako ispunjavaju sigurnosne zahtjeve propisane BAS EN 1270 i BAS EN 749.
- (5) Za nedatirane standarde, primjenjuje se zadnje izdanje referentnog standarda.

Član 14.

(Sigurnost igrališta)

- Dječije igralište smatra se sigurnim, ako svaki komad opreme za dječije igralište koji se nalazi na dječijem igralištu ispunjava minimalne zahtjeve u skladu s tehničkim normama, te je postavljen na siguran način, ako drugi sadržaji dječijeg igrališta ne predstavljaju nesrazmjernu opasnost.
- Činjenica da komad opreme za dječije igralište ne predstavlja nesrazmjernu opasnost može se dokazati, osim činjenicom da oprema ispunjava zahtjeve tehničke norme iz člana 13. ove uredbe, posebno rezultatima ispitivanja za određivanje ozbiljnosti rizika za zdravlje i sigurnost korisnika opreme za dječije igralište.
- Oprema za dječije i sportsko igralište postavlja se na igralište u skladu s uputama proizvođača opreme. Od takvih uputa može se odstupiti samo ako se ne narušava sigurnost igrališta u skladu sa općom sigurnosti proizvoda.
- Na opremu za dječije i sportsko igralište pričvršćuje se obavijest kojom se upozorava na rizike i koja se ne smije ukloniti tokom proizvodnje ili postavljanja te opreme. Obavijest s upozorenjem mora biti čitljiva, napisana

najednom od jezika koji su u službenoj upotrebi u Bosni i Hercegovini, neizbrisiva i otporna na okolišne utjecaje.

Član 15.

(Minimalni prostor)

Minimalni prostor za komad opreme za igralište ne smije zadirati u minimalni prostor za drugi komad opreme za igralište niti sadržavati bilo što, a što bi povećalo rizik za korisnike opreme u toku korištenja.

Član 16.

(Informacije koje treba da osigura proizvođač/dobavljač površina za ublažavanje udara)

- Površina koja ublažuje udarce postavlja se na dječije igralište u skladu s uputama proizvođača površine koja ublažuje udarce. Od takvih uputa može se odstupiti samo ako se ne narušava sigurnost dječijeg igrališta u skladu sa općom sigurnosti proizvoda.
- Proizvođač/dobavljač površina za ublažavanje udara treba da osigura sljedeće informacije u skladu sa standardima iz člana 13. ove uredbe, a naročito:
 - prethodne informacije za površine za ublažavanje udara koje uključuju:
 - jasne informacije o vrsti materijala i dubini sloja koji će se koristiti za koju kritičnu visinu pada,
 - opis postupka instalacije, klimatska ograničenja instalacije i druge potrebne mjere opreza,
 - postupke koje treba slijediti za upotrebu, pregled i održavanje plohe,
 - faktori koji bi mogli utjecati na svojstva površine za ublažavanje udara u radu,
 - period za koji se očekuje odgovarajući nivo ublažavanja udara uz odgovarajuće održavanje, - kako materijal omogućava rutinski pregled temelja opreme, posebno tamo gdje oprema s jednim stubom treba biti okružena mokrim materijalom za nalijevanje/ulijevanje,
 - da li je materijal namijenjen unutarnjoj ili vanjskoj upotrebi ili oboje,
 - dostupnost rezervnih dijelova (ako postoje) i metoda koja će se koristiti za popravak lokaliziranih područja šteta,
 - bilješka koja operateru skreće pažnju na potrebu povećanja učestalosti pregleda/održavanja ako je površina za ublažavanje udara podložna intenzivnoj upotrebi i/ili bilo kojim drugim uvjetima koji bi mogli smanjiti ublažavanje udara (npr. razgradnja organskih materijala ili vandalizam, kao i utjecaj starenja zbog izloženosti UV zračenju),
 - upozorenje da treba voditi računa o specifičnim opasnostima za djecu, tokom nepotpune instalacije ili tokom održavanja.
 - informacije o ugradnji za površinu za ublažavanje udara:
 - potpuna i detaljna uputstva o postavljanju najednom od jezika koji su u službenoj upotrebi u Bosni i Hercegovini, čitko i u jednostavnom obliku,
 - cjelovit postupak pripreme tla, podloge, drenaže, itd.,
 - detalje o montaži i ugradnji površine i opreme potrebne za osiguranje odgovarajućeg nivoa ublažavanja udara,
 - kako postupati s rubovima, obodima i spojevima s drugim materijalima,

- bilo kakva vremenska ograničenja tokom instalacije i potrebne naknadne zaštite od vremenskih prilika,
 - posebna uputstva ako je određeni pejzažni profil potreban za sigurnu ugradnju i izvođenje;
 - uvjeti za zadovoljavanje potreba površina za ublažavanje udara prema slobodnoj visini pada opreme.
- c) informacije o pregledu i održavanju površine za ublažavanje udara:
- uputstva za postupke održavanja i inspekcije, npr. uklanjanje kontaminata, uz izjavu da će učestalost pregleda zavisiti o vrsti korištenog materijala površine za ublažavanje udara i njenom okruženju, npr. područja za pristup/izlaz i drugim faktorima, npr. intenzivna upotreba, nivoi vandalizma, obalna lokacija, zagađenje zraka, starenje materijala,
 - podatke potrebne za zadržavanje potrebnih performansi (npr. minimalna dubina površine za ublažavanje udara) i ako je moguće, popravak ili dopunjavanje površine za ublažavanje udara. Za sve vrste površina za ublažavanje udara posebna pažnja posvetit će se efektima starenja (izloženost UV zračenju, vrućini, hladnoći, onečišćenju), a koji uzrokuju razgradnju ili gubitak svojstva ublažavanja udara,
 - identifikacija rezervnih dijelova (konektori, ploče i sl.),
 - označiti površinu igrališta za ublažavanje udara ili osigurati pismene podatke za njenu identifikaciju i izvedbu.
- Član 17.
- (Informacije koje treba da osigura proizvođač/dobavljač dječije i sportske opreme)
- Proizvođač/dobavljač dječije i sportske opreme treba da osigura sljedeće informacije u skladu sa standardima iz člana 13. ove uredbe, a naročito:
- a) opće informacije o proizvodu najednom od jezika koji su u službenoj upotrebi u Bosni i Hercegovini, čitko i u jednostavnom obliku:
- pojedinosti o postavljanju, upotrebi, pregledu i održavanju opreme,
 - klauzula ili napomena kojom se operateru skreće pažnja na potrebu povećanja pregleda/održavanja ako je oprema izložena velikoj upotrebi i/ili ako se stabilnost opreme oslanja na jedan stub,
 - savjet za brigu u vezi sa specifičnim opasnostima za djecu zbog nepotpune instalacije ili demontaže ili tokom održavanja.
- b) prethodne informacije o sigurnosti instalacije minimalnog prostora, i to:
- minimalni prostor,
 - zahtjeve za površine (uključujući slobodnu visinu pada i obim površine),
 - pojedinosti o temeljima i sve posebne odredbe o njihovoj dostupnosti tokom pregleda i održavanja,
 - ukupne dimenzije najvećeg dijela (dijelova),
 - masa najtežeg dijela/odjeljka u kilogramima,
 - smjernice u vezi s ciljanom korisničkom grupom za opremu,
 - da li je oprema namijenjena samo za unutarnju upotrebu ili pod nadzorom,
- dostupnost rezervnih dijelova,
 - potvrda usklađenosti s odgovarajućim evropskim standardom.
- c) informacije o postavljanju, sa crtežima i dijagramima koji moraju jasno sadržavati glavne dimenzije opreme i odgovarajući prostor, visine i područja potrebna za ugradnju, kao i detalje potrebne za pregled opreme igrališta prije njene prve upotrebe i to:
- minimalni prostorni zahtjevi i sigurnosni razmaci,
 - identifikacija opreme i dijelova,
 - redoslijed montaže (uputstva za montažu i pojedinosti o ugradnji),
 - odgovarajuća pomagala prema potrebi, npr. znakovi na dijelovima praćeni odgovarajućim uputstvima,
 - potreba za bilo kojim posebnim alatom, uređajima za podizanje, šablonima ili drugim pomoćnim aparatima za sklapanje koji se mogu koristiti i bilo kojim drugim mjerama predostrožnosti koje treba poduzeti. Ukoliko je potrebno, treba dati vrijednosti zakretnog momenta,
 - konstrukcijski prostor potreban za ugradnju dijela opreme,
 - orijentacija, prema potrebi, u odnosu na sunce i vjetar,
 - pojedinosti o potrebnom temelju, u normalnim uvjetima, sidrištu u zemlji i dizajnu i mjestu temelja (s napomenom da treba voditi računa o abnormalnim uvjetima),
 - pojedinosti o temeljima i posebne odredbe o njihovoj dostupnosti tokom inspekcije i održavanja,
 - posebna uputstva ako je određeni pejzažni profil neophodan za siguran rad (npr. Visina pada),
 - slobodna visina pada (za potrebe površine za ublažavanje udara),
 - potreba i detalji primjene bilo kojeg bojenja ili obrade,
 - uklanjanje pomoćnih sredstava za montažu prije upotrebe opreme.
- d) informacije o pregledu i održavanju:
- uputstva za održavanje (označena brojem standarda) koja uključuju izjavu da će se učestalost inspekcije razlikovati s vrstom opreme, npr., oprema gdje se stabilnost oslanja na jedan stup ili na upotrebjene materijale i druge faktore (npr. velika i intenzivna upotreba, nivoi vandalizma, obalna lokacija, zagađenje zraka, starost opreme),
 - crteže i dijagrame potrebne za održavanje, pregled i provjeru ispravnog rada te prema potrebi, popravak opreme,
 - učestalost s kojom se oprema ili njeni dijelovi trebaju pregledati ili održavati,
 - identifikacija rezervnih dijelova.
- e) informacije o podlozi koja ublažava udar:
- proizvođač treba, a prije prihvatanja narudžbe od naručioca, da dostavi informacije o kritičnoj visini pada za podlogu koja ublažava udar,
 - dobavljač podloge za igralište treba da dostavi upute za ispravnu ugradnju, pregled i održavanje,

- proizvođač/dobavljač treba da odredi podlogu za igralište.

Član 18.

(Obaveze vlasnika dječijeg i sportskog igrališta)

- (1) Vlasnik dječijeg i sportskog igrališta:
 - a) stavlja u upotrebu samo ono dječije i sportsko igralište koje posjeduje dozvole iz člana 12. stav (4) ove uredbe, odnosno za postojeća igrališta za koje je izdata potvrda o pregledu u skladu sa članom 36. ove uredbe,
 - b) osigurava da su ispunjeni osnovni zahtjevi za sigurnost igrališta iz člana 13. ove uredbe,
 - c) provodi ili dogovara pregled dječijeg i sportskog igrališta u skladu sa članom 28. ove uredbe,
 - d) odmah uklanja opremu za dječije igralište ili druge sadržaje dječijeg i sportskog igrališta ili ograničava javni pristup dječijem i sportskom igralištu ili drugim sadržajima dječijeg i sportskog igrališta na potrebno vrijeme ako oprema za dječije i sportsko igralište ili drugi sadržaji igrališta predstavljaju nesrazmjernu opasnost tokom radnog vremena igrališta, te informiše korisnike igrališta o ograničenom pristupu s pomoću lako čitljive obavijesti odgovarajuće vidljivosti,
 - e) ograničava javni pristup minimalnom prostoru za opremu za dječije i sportsko igralište ili drugim sadržajima igrališta u toku njihovog održavanja ako se ono provodi u toku radnog vremena, te informiše korisnike igrališta o provođenju održavanja s pomoću lako čitljive obavijesti odgovarajuće vidljivosti,
 - f) postavlja informativni pano u skladu sa čl. 23. i 40. ove uredbe,
 - g) vodi i stavlja na raspolaganje zapisnik o ozljedama u skladu sa članom 24. ove uredbe,
 - h) čuva potvrdu o pregledu i izvještaj o godišnjem pregledu igrališta tri godine od datuma njihova sastavljanja, te ih na zahtjev stavlja na raspolaganje nadzornom tijelu,
 - i) nadzornom tijelu osigurava saradnju potrebnu za provođenje nadzora.
- (2) Obaveza stavljanja u upotrebu samo onog dječijeg i sportskog igrališta za koje je izdana potvrda o pregledu odnosno upotrebna dozvola jednako se odnosi na stavljanje dječijeg i sportskog igrališta u upotrebu nakon što je na dječijem i sportskom igralištu izvršena promjena, ako to može bitno uticati na sigurnost dječijeg igrališta.
- (3) Promjenom dječijeg i sportskog igrališta smatra se posebno promjena prostora dječijeg i sportskog igrališta, promjena prostora za opremu za dječije i sportsko igralište, dodavanje nove opreme za dječije i sportsko igralište ili zamjena opreme za dječije i sportsko igralište novom opremom za dječije i sportsko igralište sa drugačije razgraničenim prostorom. Promjenom dječijeg i sportskog igrališta ne smatra se popravak opreme za dječije i sportsko igralište ili njezina dijela, površine koja ublažuje udarce ili drugih sadržaja dječijeg i sportskog igrališta isključivo radi njihova održavanja, popravka ili zamjene ako to ne utiče bitno na značajke igrališta, opreme za igralište niti površine koja ublažava udarce.
- (4) Obaveze iz st. (2) i (3) ovog člana ne odnose se na vlasnika dječijeg igrališta koje je sastavljeno isključivo od komada opreme za dječije igralište koji su prijenosni i koji se stavljaju na određeno mjesto samo privremeno i povremeno.
- (5) Vlasnik dječijeg i sportskog igrališta dužan je pružiti informacije korisnicima igrališta o odgovornosti za štetu

ili povredu zdravlja uzrokovanu upotrebom dječijeg i sportskog igrališta u toku rada igrališta.

- (6) Ako se ne može utvrditi identitet vlasnika dječijeg i sportskog igrališta, fizička ili pravna osoba koja je vlasnik zemljišta ili objekta na kojem se nalazi dječije igralište odgovorna je za ispunjavanje obveza vlasnika dječijeg i sportskog igrališta.
- (7) Obavezno održavanja vlasnik može povjeriti pravnom licu u skladu sa čl. 20. i 22. ove uredbe.

Član 19.

(Radno vrijeme i pravila ponašanja na dječijim i sportskim igralištima)

- (1) Dječija i sportska igrališta se mogu koristiti u periodu od 06 do 22 sata.
- (2) Djeca koriste opremu na igralištu u skladu sa dobi za koju je namjenjena, uz nadzor i prisustvo odrasle osobe.
- (3) Dječija igrališta moraju imati oznaku za koju dječiju dob su namjenjena.
- (4) Dječija i sportska igrališta se moraju koristiti u skladu sa njihovom namjenom.
- (5) Odrasle osobe i djeca za čiju dob dječije igralište nije namijenjeno ne smiju koristiti dječije igralište.
- (6) Zabranjeno je uvoditi i hraniti kućne ljubimce i druge životinje na dječijem i sportskom igralištu.
- (7) Zabranjeno je konzumirati alkohol na dječijem i sportskom igralištu.
- (8) Zabranjeno je prisustvo i okupljanje odraslih osoba na dječijem igralištu koja nisu nadzor djeci koja koriste dječije igralište.
- (9) Zabranjeno je prisustvo i okupljanje odraslih osoba na sportskom igralištu ukoliko ne koriste igralište u skladu sa njegovom namjenom.
- (10) Nadležni organi mogu zabraniti korištenje dječijih i sportskih igrališta u cilju prevencije širenja zaraze ili zaštite javnog interesa.

Član 20.

(Održavanje)

- (1) Održavanje dječijih i sportskih igrališta vrši komunalno preduzeće nadležno za održavanje javnih zelenih površina, koje je registrovano i za poslove održavanja dječijih i sportskih igrališta.
- (2) Održavanje podrazumijeva radove koji ne utiču na konstrukciju građevine, zaštitu okoline, namjenu, promjenu dimenzija i vanjskog izgleda, odnosno građevinski i drugi radovi na postojećoj građevini radi očuvanja osnovnih zahtjeva za građevinu tokom njezina trajanja, kojima se ne mijenja usklađenost građevine s lokacijskim uvjetima u skladu s kojima je izgrađena.
- (3) Održavanje dječijih i sportskih igrališta podrazumijeva:
 - a) redovne preglede dječijeg i sportskog igrališta odnosno njegovih dijelova, u razmacima i na način koji su određeni projektom i pisanom izjavom izvođača o izvedenim radovima i o uvjetima održavanja građevine i/ili posebnim propisom donesenim u skladu s odredbama propisa koji regulišu oblast građenja, a u slučaju ugrađene opreme, uređaja i instalacija i s planom servisiranja u rokovima propisanim u garancijama proizvođača ugrađenih proizvoda,
 - b) vanredne preglede dječijeg i sportskog igrališta, odnosno njegovih dijelova nakon vanrednog događaja ili po inspekcijском nadzoru,
 - c) izvođenje radova kojima se dječije i sportsko igralište odnosno njegov dio zadržava ili se vraća u tehničko i/ili funkcionalno stanje određeno projektom odnosno

- propisima te aktima za građenje u skladu s kojima je izgrađeno,
- d) održavanje higijene i hortikulturnih sadržaja na dječijem i sportskom igralištu u skladu sa planom i programom održavanja javnih zelenih površina,
 - e) vođenje i čuvanje dokumentacije o održavanju dječijeg igrališta: u kontinuitetu rednih brojeva, sastavljenih zapisnika s prilogima o redovnim i vanrednim pregledima, te izvedenim radovima u svrhu očuvanja projektiranih osnovnih zahtjeva za igralište, funkcionalnosti i sigurnosti igrališta u upotrebi,
 - f) pripremu plana održavanja igrališta usaglašenog sa općinama, odnosno vlasnicima igrališta na području Kantona Sarajevo i obavezu dostavljanja istog ministarstvu nadležnom za komunalne poslove do oktobra tekuće godine za narednu godinu, na usvajanje.

Član 21.

(Sredstva za održavanje igrališta)

- (1) Sredstva za održavanje dječijih i sportskih igrališta na javnim površinama obezbjeđuju se iz Budžeta Kantona Sarajevo, u okviru sredstava za održavanje javnih zelenih površina.
- (2) Izuzetno, kada zbog nedostatka sredstava postoji opasnost od prekida poslova redovnog održavanja, a što može dovesti do štetnih posljedica, sredstva se obezbjeđuju i u Budžetu Grada, odnosno općine, u skladu sa finansijskim mogućnostima jedinica lokalne samouprave na području Kantona Sarajevo.

Član 22.

(Preuzimanje održavanja dječijih i sportskih igrališta)

- (1) Komunalno preduzeće nadležno za održavanje javnih zelenih površina, vrši preuzimanje održavanja dječijih i sportskih igrališta zajedno sa cjelokupnom investiciono-tehničkom dokumentacijom koja se odnosi na pomenuta igrališta.
- (2) Primopredaja se vrši između komunalnog preduzeća i vlasnika igrališta i obavlja se komisijski. Komisija je sastavljena od četiri člana od kojih su dva člana predstavnici komunalnog preduzeća i dva člana vlasnika igrališta.
- (3) Prilikom primopredaje sastavlja se zapisnik koji potpisuju članovi Komisije i isti se izrađuje u pet primjeraka, od kojih dva zadržava preduzeće, dva vlasnik i jedan se dostavlja nadležnom ministarstvu za komunalne poslove.

Član 23.

(Informativni pano za dječija i sportska igrališta)

- (1) Dječije i sportsko igralište mora imati informativni pano koji postavlja vlasnik igrališta za novoizgrađena igrališta i igrališta koja nisu predana komunalnom preduzeću na upravljanje, s navedenim informacijama:
 - a) nazivom igrališta,
 - b) adresom igrališta,
 - c) identifikacijskim podacima vlasnika igrališta,
 - d) identifikacijskim podacima komunalnog preduzeća ako je ovlašteno za ispunjavanje obveza vlasnika dječijeg igrališta,
 - e) informacijama o razdoblju kalendarske godine u kojem je igralište dostupno javnosti i radnim vremenom igrališta,
 - f) kojoj starosnoj dobije igralište namijenjeno,
 - g) pravila ponašanja na igralištu,
 - h) podatke o spravama i rekvizitima,
 - i) datumom posljednjeg pregleda dječijeg igrališta,

- j) napomenu da se sprave i rekviziti koriste na vlastitu odgovornost,
 - k) kontakt podacima za prijavu nedostataka na igralištu,
 - l) telefonskim brojem za hitne pozive (policija, hitna, vatrogasci) i kontakt telefon kantonalne i općinske inspekcije,
 - m) ograničenjima i drugim uvjetima upotrebe igrališta, ako su utvrđeni.
- (2) Ukoliko je vlasnik povjerio na održavanje igralište komunalnom preduzeću, eventualni prigovori na zatečena stanja i nepravilnosti koje se uoče na igralištima prijavljuju se komunalnim: redarima ili neposredno komunalnom preduzeću koje je zaduženo za održavanje igrališta putem telefonskog broja koji je dostupan 24 sata i isti mora biti naveden na informativnom panou.
 - (3) Informativni pano iz stava (1) ovog člana mora biti neizbrisiv, lako čitljiv i napisan na jednom od jezika koji su u službenoj upotrebi u Bosni i Hercegovini.
 - (4) Ako je prostor dječijeg i sportskog igrališta razgraničen ogradom, informativni pano iz stava (1) ovog člana mora se postaviti na svaki ulaz u prostor dječijeg i sportskog igrališta.

Član 24.

(Zapisnik o ozljedama)

- (1) Vlasnik dječijeg i sportskog igrališta i komunalno preduzeće, ako je zaduženo za održavanje dječijeg i sportskog igrališta, vode pisani zapisnik svih prijavljenih ozljeda koje nastanu na prostoru igrališta, osim anonimno prijavljenih ozljeda.
- (2) Za svaku prijavljenu ozljedu u zapisnik se zapisuje:
 - a) datum i vrijeme nastanka ozljede,
 - b) dob ozlijeđene osobe,
 - c) oznaku opreme za dječije i sportsko igralište ili druge lokacije na prostoru dječijeg i sportskog igrališta gdje je ozljeda nastala,
 - d) vrsta ozljede,
 - e) opis ozljede,
 - f) da li je ozljeda zahtijevala hospitalizaciju ozlijeđene osobe,
 - g) mjere za obezbjeđenje sigurnosti dječijeg i sportskog igrališta koje su provedene nakon prijave ozljede, odnosno o kontroli ispravnosti i sigurnosti dječijeg i sportskog igrališta u okviru kojeg je ozljeda nastala.
- (3) Vlasnik dječijeg i sportskog igrališta, odnosno komunalno preduzeće koje je zaduženo za održavanje, obavještava nadzorni organ o svakoj ozljedi u roku od tri radna dana od datuma prijema obavijesti o ozljedi.
- (4) Za svaku prijavljenu ozljedu pojedinosti iz stava (2) ovog člana čuvaju se pet godina nakon datuma na koji je ozljeda nastala.
- (5) Vlasnik dječijeg i sportskog igrališta, odnosno komunalno preduzeće koje je zaduženo za održavanje, na zahtjev nadzornog organa stavlja na raspolaganje zapisnik o ozljedama.

Član 25.

(Pregled igrališta)

- (1) Pregledom dječijeg i sportskog igrališta procjenjuje se i ocjenjuje stanje igrališta, pojedinačnih komada opreme za igralište i površine igrališta.
- (2) Pregled dječijeg i sportskog igrališta provodi se na osnovu provjere dječijeg i sportskog igrališta.
- (3) Oprema i njeni dijelovi moraju se pregledavati i održavati u skladu s uputstvima proizvođača uz učestalost koja nije manja od one koju daje proizvođač.
- (4) Oprema i njeni dijelovi moraju se pregledati, na način:

- a) rutinski pregled,
- b) operativni pregled,
- c) godišnji pregled.

Član 26.

(Rutinski pregled)

- (1) Rutinski vizuelni pregled omogućava prepoznavanje očiglednih opasnosti koje mogu nastati usljed vandalizma, upotrebe ili vremenskih uvjeta, npr. opasnosti kao što su slomljeni dijelovi ili razbijene boce.
- (2) Za igrališta koja su izložena velikoj i intenzivnoj upotrebi ili vandalizmu, potreban je svakodnevni pregled ove vrste.
- (3) Rutinski pregled obavlja komunalno preduzeće koje je zaduženo za održavanje, odnosno vlasnik ukoliko isto nije povjereno na održavanje komunalnom preduzeću.

Član 27.

(Operativni pregled)

- (1) Operativni pregled je detaljniji pregled radi provjere rada i stabilnosti opreme, posebno radi provjere istrošenosti.
- (2) Pregled treba biti obavljen svakih jedan do tri mjeseca ili kako je naznačeno u uputstvima proizvođača.
- (3) Operativni pregled obavlja komunalno preduzeće koje je zaduženo za održavanje, odnosno vlasnik ukoliko isto nije povjereno na održavanje komunalnom preduzeću.

Član 28.

(Godišnji pregled)

- (1) Godišnji glavni pregled provodi se radi utvrđivanja ukupnog nivoa sigurnosti opreme, temelja i površina, npr. usklađenost s relevantnim dijelovima EN 1176, uključujući sve promjene koje su nastale kao rezultat procjene sigurnosnih mjera, utjecaje vremenskih prilika, prisutnost truleži ili korozije i bilo kakve promjene nivoa sigurnosti opreme kao rezultat izvršenih popravaka ili dodanih ili zamijenjenih sastavnih dijelova. Posebnu pažnju treba posvetiti dijelovima koji su "zapečaćeni za cijeli vijek trajanja".
- (2) Godišnji glavni pregled može uključivati iskop ili demontažu određenih dijelova. Dodatne mjere mogu biti potrebne za otkrivanje drugih mogućih pogoršanja stanja konstrukcije.
- (3) Godišnji glavni pregled provodi vlasnik igrališta putem inspekcijiskog nadzora, uz prisustvo predstavnika komunalnog preduzeća ukoliko je isto zaduženo za održavanje.

Član 29.

(Izveštaj o godišnjem pregledu)

- (1) Godišnji inspekcijiski nadzor obavlja nadležna osoba sa znanjem i iskustvom za tu vrstu objekta, za reviziju postupaka i identifikiranje dugoročnih problema, sa pripadajućom posebnom pažnjom "trajno zatvorenim" dijelovima.
- (2) Osoba iz stava (1) ovog člana sastavlja izvještaj o godišnjem pregledu dječijeg i sportskog igrališta koji sadrži:
 - a) identifikacijske podatke ovlaštene osobe koja je provela godišnji pregled,
 - b) serijski broj izvještaja o godišnjem pregledu,
 - c) identifikacijske podatke dječijeg i sportskog igrališta,
 - d) datum na koji je dječje i sportsko igralište pregledano,
 - e) obim pregleda dječijeg i sportskog igrališta,
 - f) popis i opis lokacija opreme za dječje i sportsko igralište i drugih sadržaja igrališta,
 - g) procjenu stanja opreme za dječje i sportsko igralište, drugih sadržaja dječijeg i sportskog igrališta i površine koja ublažuje udarce,

- h) popis nedostataka na dječjem i sportskom igralištu, ako su pronađeni, te predložene mjere za njihovo otklanjanje,
- i) zaključak,
- j) datum i mjesto sastavljanja izvještaja,
- k) potpis osobe ovlaštene za provođenje godišnjeg pregleda, a koja je provela godišnji pregled.

- (3) Fotografski zapisi o opremi za dječje i sportsko igralište, drugim sadržajima dječijeg i sportskog igrališta i površini koja ublažuje udarce u kojima su zabilježeni pronađeni nedostaci čine obavezni prilog izvještaja iz stava (2) ovog člana.
- (4) Popis i opis lokacije opreme za igralište iz stava (2) tačka g) ovog člana može se zamijeniti jednostavnim situacijskim nacrtom ili planom igrališta ili drugim vizuelnim zapisom o dječijem i sportskom igralištu kojim se prikazuje stanje igrališta na datum pregleda.
- (5) Zaključak iz stava (2) tačka i) ovog člana sadrži stručnu procjenu osobe ovlaštene za provedbu godišnjeg pregleda o tome je li na temelju nalaza iz stava (2) tač. h) i i) ovog člana stanje dječijeg i sportskog igrališta zadovoljavajuće, djelomično zadovoljavajuće ili nezadovoljavajuće.
- (6) Ako su ispunjeni svi osnovni zahtjevi za sigurnost dječijeg i sportskog igrališta, te nisu pronađeni nikakvi nedostaci, stanje dječijeg igrališta smatra se zadovoljavajućim.
- (7) Ako se pregledom osnovnih zahtjeva pronađu nedostaci uzrokovani vremenskim uvjetima, vandalizmom ili pogrešnim ili neodgovarajućim održavanjem ili drugi nedostaci koji ne uzrokuju nesrazmjernu opasnost, te se dječje igralište može učiniti sigurnim ako se oni otklone, stanje dječijeg i sportskog igrališta je djelomično zadovoljavajuće.
- (8) Ako se pregledom stanja dječijeg i sportskog igrališta utvrdi da igralište nije sigurno, stanje igrališta je nezadovoljavajuće.
- (9) Osoba ovlaštena za provedbu godišnjeg pregleda dječijeg i sportskog igrališta čuva jedan primjerak izvještaja o godišnjem pregledu dječijeg i sportskog igrališta pet godina nakon datuma njegovog sastavljanja, te ga stavlja na raspolaganje na zahtjev nadzornog tijela, a jedan primjerak izvještaja o godišnjem pregledu dostavlja vlasniku i komunalnom preduzeću ukoliko je isto zaduženo za održavanje pregledanog igrališta najkasnije u roku od 30 dana od datuma pregleda.

Član 30.

(Raspored pregleda)

Da bi se spriječile nesreće, vlasnik ili komunalno preduzeće ovlašteno za održavanje igrališta moraju osigurati uspostavljanje i održavanje odgovarajućeg rasporeda pregleda za svako igralište uzimajući u obzir lokalne uvjete i uputstva proizvođača koji mogu uticati na potrebnu učestalost pregleda. U rasporedu trebaju biti navedeni sastavni dijelovi za pregled tokom raznih inspekcija i metode inspekcije.

Član 31.

(Otklanjanje nedostataka)

- (1) Ako se tokom pregleda otkriju ozbiljni nedostaci koji mogu predstavljati opasnost, vlasnik odnosno komunalno preduzeće kojem je povjereno održavanje treba ih otkloniti bez odlaganja. Ako to nije moguće, opremu treba osigurati od upotrebe, npr. imobilizacija ili uklanjanje.
- (2) Ukoliko predmetni radovi iz stava (1) ovog člana ne spadaju u radove iz člana 20. ove uredbe, komunalno preduzeće će obavijestiti vlasnika igrališta o istom.
- (3) Vlasnik odnosno nadležno komunalno preduzeće kojem je povjereno održavanje dužno je odmah vidno obilježiti i

onemogućiti daljnje korištenje opreme do dovođenja u ispravno stanje ili uklanjanja.

- (4) Tamo gdje se dio opreme treba ukloniti s lokacije, na primjer radi održavanja, sva sidrišta ili temelji koji ostanu u zemlji treba ukloniti ili zaštititi, a mjesto učiniti sigurnim.

Član 32.

(Kvalifikacija osoblja)

- (1) Osoblje koje obavlja zadatke kao dio upravljanja sigurnošću poput pregleda, popravka i održavanja, treba biti kompetentno. Nivo kompetencije varirat će zavisno o zadatku, te će se organizovati odgovarajuće buke.
- (2) Osoblje treba imati odgovarajuće informacije o svojim zadacima i odgovarajuće informacije o svojim odgovornostima i ovlaštenju. Samo kvalificirano osoblje smije izvoditi bilo kakav posao, poput zavarivanja dijelova konstrukcije, za koje se smatra da utiču na sigurnost opreme.

Član 33.

(Vođenje evidencije)

- (1) O svim radnjama koje su poduzete u sklopu upravljanja sigurnošću treba voditi evidenciju.
- (2) Dokumenti koji se odnose na igralište trebaju uključivati:
- potvrdu o pregledu i ispitivanju,
 - uputstva za pregled i održavanje,
 - uputstva za upotrebu, ako je primjenjivo,
 - sve evidencije o pregledu i održavanju, npr. dnevnik,
 - specifični projektni i tenderski dokumenti i si.
- (3) Ovi dokumenti trebaju biti dostupni kada su potrebni za održavanje, pregled, popravak te u slučaju nesreće.
- (4) Neophodno je postojanje pisanih operativnih postupaka koji obuhvataju mjere koje se trebaju poduzeti u slučaju nesreće, požara i slično.

Član 34.

(Katastar dječijih i sportskih igrališta)

- (1) O dječijim i sportskim igralištima vodi se evidencija u digitalnom Katastru javnih zelenih površina Kantona Sarajevo od strane nadležnog komunalnog preduzeća.
- (2) Uspostavu, ažuriranje i praćenje evidencije dječijih i sportskih igrališta vrši nadležno komunalno preduzeće i vlasnik igrališta.

Odjeljak C. Postojeća igrališta

Član 35.

(Postojeća dječija i sportska igrališta)

Postojeća dječija i sportska igrališta su ona igrališta koja su izgrađena i korištena prije stupanja na snagu ove uredbe, a za ista je potrebno utvrditi stanje ispravnosti i mogućnost njihovog korištenja.

Član 36.

(Komisija za procjenu stanja dječijih i sportskih igrališta)

Komisija za procjenu stanja dječijih i sportskih igrališta sastavljena od predstavnika komunalnog preduzeća nadležnog za održavanje javnih zelenih površina i predstavnika općine na području Kantona Sarajevo, odnosno vlasnika igrališta, u skladu sa članom 22. stav (2) ove uredbe, izvršit će obilazak i kontrolu svih postojećih igrališta i zapisnički konstatovati stanje igrališta u smislu njegove ispravnosti i namjene, kao i ispravnost i funkcionalnost dječijih sprava i rekvizita za igru djece, sportskih sprava i rekvizita i zaštitnih ograda, a koja nisu data na upravljanje nadležnom komunalnom preduzeću do stupanja na snagu ove uredbe.

Član 37.

(Uklanjanje neispravnih dječijih sprava, rekvizita za igru djece, sportskih sprava i rekvizita i zaštitnih ograda)

- (1) Dječije sprave, rekviziti za igru djece, sportske sprave i rekviziti i zaštitne ograde za koje Komisija iz člana 36. ove uredbe konstatuje da su neispravni i da se isti ne mogu

upotrebljavati u svrhu za koju su namijenjeni, vlasnik odnosno nadležno komunalno preduzeće dužno je odmah vidno obilježiti i onemogućiti daljnje korištenje opreme do dovođenja u ispravno stanje ili uklanjanja.

- (2) Dječije sprave, rekviziti za igru djece, sportske sprave i rekviziti i zaštitne ograde za koje Komisija utvrdi da su neispravni i da se ne mogu upotrebljavati u svrhu za koju su namijenjeni, uklonit će se najkasnije u roku od sedam dana od dana kada se za iste konstatuje neispravnost.

Član 38.

(Sredstva za uklanjanje neispravnih dječijih sprava, rekvizita za igru djece, sportskih sprava i rekvizita i zaštitnih ograda)

Finansijska sredstva za uklanjanje neispravnih dječijih sprava, rekvizita za igru djece, sportskih sprava i rekvizita i zaštitnih ograda, obezbijedit će općine na području Kantona Sarajevo.

Član 39.

(Održavanje postojećih dječijih i sportskih igrališta)

- (1) Postojeća dječija i sportska igrališta sa kojih se uklone ili stave u funkciju dječije sprave, rekviziti za igru djece i sportske sprave i rekviziti, daju se na održavanje nadležnom komunalnom preduzeću.
- (2) Općine na čijem području se nalaze dječija i sportska igrališta sa kojih su uklonjene sprave i rekviziti, u skladu sa finansijskim mogućnostima, izvršit će postavljanje novih sprava i rekvizita u skladu sa važećim standardima, nakon čega će održavanje istih preuzeti nadležno komunalno preduzeće.
- (3) Obavezu održavanja i finansiranja održavanja igrališta koja se ne predaju na upravljanje i održavanje komunalnom preduzeću, izvršava vlasnik igrališta.

Član 40.

(Informativni pano za postojeća igrališta)

Postavljanje informativnog panoa sa informacijama predviđenim članom 23. ove uredbe za postojeća igrališta vrši komunalno preduzeće, odnosno vlasnik igrališta ukoliko nije povjerio održavanje igrališta komunalnom preduzeću.

DIO ČETVRTI - ZAJEDNIČKE ODREDBE Odjeljak A. Zabranjene radnje i naknada štete

Član 41.

(Zabranjene radnje)

Na zelenim i rekreativnim površinama zabranjeno je:

- sječa stabala bez odobrenja,
- oštećivanje i uništavanje zasada, travnjaka i staza,
- oštećivanje i uništavanje dječijih rekvizita, sprava za igru djece i sportskih rekvizita,
- zakivanje i postavljanje reklamnih panoa i lijepljenje plakata na stablima, opremi i objektima,
- oštećivanje, uništavanje i premještanje klupa, korpi za otpatke, ograde i druge opreme i objekata,
- upotreba postavljenih rekvizita na dječijim igralištima od strane odraslih,
- branje plodova, sjemena i sadnog materijala, osim nadležnog komunalnog preduzeća,
- vožnja i parkiranje svih vrsta motornih vozila,
- kopanje odnosno vađenje zemlje, pijeska, šljunka i kamena,
- ispuštanje otpadnih voda i drugih štetnih materija, istovar bilo kakvog materijala ili robe, otpadaka i drugog smeća,
- prekopavanje zemljišta i premještanje sadnica bez odobrenja,
- deponovanje snijega i leda kao i posipnog materijala za sprečavanje poledice,
- paljenje i loženje vatre izvan za to predviđenih mjesta,

- n) napasanje stoke i izvođenje životinja na zelenim i rekreativnim površinama,
- o) ubijanje, hvatanje i gonjenje ptica i životinja koje žive na zelenim i vodenim površinama parkova,
- p) uvođenje pasa i drugih kućnih ljubimaca na dječija i sportska igrališta,
- r) izlaganje knjiga, pokućstva, rabljenih i drugih stvari,
- s) devastacija zelenih površina na saniranim klizištima na gradskom građevinskom zemljištu,
- t) pranje vozila, ćilima i slične radnje na i oko zelenih površina,
- u) obavljanje drugih radnji koje oštećuju ili uništavaju javne zelene i rekreativne površine.

Član 42.

(Naknada štete na javnim zelenim i rekreativnim površinama)

- (1) Sve štete koje nastanu od strane pravnih ili fizičkih lica na javnim zelenim i rekreativnim površinama, dužni su nadoknaditi oni koji su je i prouzrokovali.
- (2) Visinu naknade štete, shodno hortikulturnim, biološkim i estetskim vrijednostima zelene površine, te štete na uređajima, spravama, rekvizitima, mobilijarima i inventaru, odredit će stručna komisija imenovana od strane nadležnog komunalnog preduzeća, a koju čine predstavnik komunalnog preduzeća koji istu održava i predstavnik vlasnika, odnosno općine na čijem se području nalazi površina na kojoj je pričinjena šteta.

Odjeljak B. Nadzor

Član 43.

(Nadzor)

- (1) Nadzor nad provođenjem ove uredbe vrši ministarstvo nadležno za komunalne poslove.
- (2) Inspekcijski nadzor nad provođenjem ove uredbe vrši nadležna kantonalna inspekcija, nadležna gradska inspekcija i nadležna općinska inspekcija.

DIO PETI - KAZNENE ODREDBE

Član 44.

(Novčana kazna za nadležno komunalno preduzeće)

- (1) Novčanom kaznom u iznosu od 2.000,00 KM do 5.000,00 KM kaznit će se preduzeće nadležno za održavanje javnih zelenih površina, ako se ne bude pridržavalo odredbi člana 3. i člana 20. stav (2) ove uredbe.
- (2) Za prekršaje iz stava (1) ovog člana, kaznit će se odgovorno lice u preduzeću nadležnom za održavanje javnih zelenih površina novčanom kaznom od 200,00 KM do 500,00 KM.

Član 45.

(Novčana kazna za pravna i fizička lica)

- (1) Novčanom kaznom od 3.000,00 KM do 6.000,00 KM kaznit će se za prekršaj pravno lice koji koristi dječija i sportska igrališta suprotno članu 11. ove uredbe.
- (2) Za prekršaje iz stava (1) ovog člana kaznit će se odgovorno lice u pravnom licu novčanom kaznom od 400,00 KM do 700,00 KM.
- (3) Novčanom kaznom od 500,00 KM do 1.500,00 KM kaznit će se za prekršaj fizičko lice koji koristi dječija i sportska igrališta suprotno članu 11. ove uredbe.
- (4) Novčanom kaznom u iznosu od 2.500,00 KM do 5.000,00 KM kaznit će se za prekršaj pravno lice ako učini koju od zabranjenih radnji iz člana 41. ove uredbe.
- (5) Za prekršaje iz stava (4) ovog člana, kaznit će se odgovorno lice u pravnom licu novčanom kaznom od 500,00 KM do 1.000,00 KM.
- (6) Novčanom kaznom od 200,00 KM do 700,00 KM kaznit će se za prekršaj fizičko lice ako učini koju od zabranjenih radnji iz člana 41. ove uredbe.

Član 46.

(Primjena drugih kaznenih odredbi)

Za prekršaje učinjene na zelenim i rekreativnim površinama, koji nisu predviđeni ovom uredbom, primjenjivat će se kaznene odredbe predviđene Zakonom o komunalnim djelatnostima.

DIO ŠESTI - PRELAZNE I ZAVRŠNE ODREDBE

Član 47.

(Prestanak važenja ranijeg propisa)

Danom stupanja na snagu ove uredbe prestaje da važi Uredba o uređivanju i održavanju zelenih i rekreativnih površina u Kantonu Sarajevo ("Službene novine Kantona Sarajevo", broj 22/16 i 30/19).

Član 48.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-50086-16/20
17. decembra 2020. godine
Sarajevo

Premijer
Mario Nenadić, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 10. stav (3) Zakona o izvršavanju Budžeta Kantona Sarajevo za 2020. godinu ("Službene novine Kantona Sarajevo", br. 10/20, 18/20 i 29/20), tačka IV i V stav (2) Odluke o kriterijima za raspodjelu sredstava iz Tekuće rezerve Budžeta Kantona Sarajevo ("Službene novine Kantona Sarajevo", broj 18/09), Vlada Kantona Sarajevo, na 47. sjednici održanoj 17.12.2020. godine, donijela je

ODLUKU**O ODOBRAVANJU IZDVAJANJA SREDSTAVA IZ
TEKUĆE REZERVE BUDŽETA KANTONA SARAJEVO
ZA 2020. GODINU**

I

Iz Tekuće rezerve Budžeta Kantona Sarajevo za 2020. godinu ("Službene novine Kantona Sarajevo", br. 10/20, 18/20 i 29/20), sa ekonomskog koda 600000 odobrava se izdvajanje sredstava u iznosu od 100,00 KM na razdjel 26, glava 01, potrošačka jedinica 0001 - Zavod za izgradnju Kantona Sarajevo, na ekonomski kod 615700 RAU001 - Kapitalni transfer međunarodnim Organizacijama - Posebna naknada za legalizaciju građevina privremenog karaktera.

II

Za realizaciju ove odluke zadužuju se Ministarstvo finansija Kantona Sarajevo i Zavod za izgradnju Kantona Sarajevo, svako u okviru svoje nadležnosti.

III

Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 02-04-50086-17/20
17. decembra 2020. godine
Sarajevo

Premijer
Mario Nenadić, s. r.

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo, na 47. sjednici održanoj 17.12.2020. godine, donijela je

ODLUKU

I

Daje se saglasnost Ministarstvu finansija Kantona Sarajevo da sa Sarajevskom regionalnom razvojnom agencijom SERDA